



С Е Р Г Е И Я Е В

Л Р

СТИХИГЬО



СЕРГЕЙ ИЗГИЯЕВ



СТИХИГЬО

ДАГЕСТАНСКОЕ КНИЖНОЕ ИЗДАТЕЛЬСТВО
МАХАЧКАЛА—1963

ДУСДИ ХЭЛГЪГЬО — ГЪУВОТИ

Гуфдиренуът: кумег эн гъуш гъэнети.
Эй чуюкле хэлгъ кумег келе милети.
Эри гьемме хэлгъгьо дусди ниети.
Шинов, бирор, дусди хэлгъгьо — гъувоти.

Фикир доре, хьовир, шинов туь сесе:
Келе бирор ме хунденуьм Уруссе,
Ме хосденуьм хэлгъгьой Китай, Индусе.
Шинов, бирор, дусди хэлгъгьо — гъувоти.

Эйму дусдуьт хэлгъгьой Конго ве Чили.
Дуьшмен иму Рокфеллери, Черчилли.
Фэхьле гисне, Черчилль э зар пичири.
Шинов, бирор, дусди хэлгъгьо — гъувоти.

МЭГІНИ ЭРИ ВАТАН

Хунчелуе сусенгуьлгьо,
Шевгьлуе мержгьо, зимигьо,
Шелбете бегьер эн боггьо,
Мезей туьни, раче Ватан.

Девлет Урал, куьмуьр Донбасс.
Нефтгьой Баку, девлет Кавказ,
Чугун, пулат, мэгІдон алмаз,
Овгьот туьни, хосе Ватан.

Фэхьлей завод, член колхоз,
Бэхьс гуьрде эекиревоз,
МэгІни хунде э меревоз,
Шори иму туьни, Ватан.

Шогьиргьойму дестон беседе,
Эри Ватан мэгІни хунде.
Гилмдангьойму зиёд сохде.
Гилм имуре изму, Ватан.

ДОГЪИСТУ

Эйму догъгьо, чуьн шогъид мундет,
Угьо изму селт дегиш бирет,
Кулелугъгьо э богъ чаруьсдет,
Улкей богъгьо бири Догъисту.

Нис оморе дие эз дигъгьо
Заруьнже сес, нолей косибгьо.
Шоре мэгІни хунде догълугъгьо
Э сер догъгьой гуьллукъ Догъисту.

Э жигей шэгІм сухде электри,
Чумгьой эн хэлгъ товуши дири.
Догълугъгьойму бесдет бирори,
Дусди иму — гъувот Догъисту.

Гювгьой Сулак мибошут муьди,
Республика э у имици.
Завод, фабрику омбор вокурди,
Гьинормендуьт хэлгъгьой Догъисту.

КОВТЕР ШОЛУМИ

Ковтер шолуми, тек туь поке муьргъи,
Эри инсонет ярашуйгъ э суьрхи.
Туьни нишоней гъовхобер шолуми,
Шолуми мозол инсонгъой гъуьломи.
Нике хэбердор, э дургъо пар зере,
Шев ве руз э товуш астарей Кремля,
Шолум ве эшгъ бер эз хэлгъ ме эй Робсон,
У гъисди буьлдуйьр шолуми эй инсон.
Диеш эшгъ ди туь дестонгъой Неруде,
Сургъой дуьшмере у э хэлгъ бурмунде.
Луи Арогон, гъовхобер азади,
У гъисд коммунист, эй расди гъэлхэнди.
Бер герме салам эри хэлгъгъой гъэреб,
Э женг азади э дуьшме зенуьт зарб.
Сиегъ ве сипи, ранг зерд бирегор,
Э зир е асму биреним бирор.
Чуьшмеш товуше сохде тен э хэлгъ бэхш,
Довгъо хоюгъо дуьшмени, беде-вэхьш.
Гъемме бироргъо: хундегор, жофокеш.
Гъулебенд гуьрде нигъилим екиреш,
Сохут дес дураз, десгъой хунризире,
Куьшуьт э гъужогъ балай гъэзизире,
Сохут хэребе ободе гъуьломе,
Хьохмой садсали ве жофой хэлгъире.

Эз коми милет бисдогеш эвлод,
У ние хогъу гІуьлом бире борбод.
Уре гьисд деде, еде хосде духдер,
Уре гьисд мирос, еде бирор, хэгьер.
Кире мивою эзугъо дур бире,
Еде пуч бирей энугьоре дире?
Иму жовонгъо, имуним гъувот девр,
Э еклуьгиму ниверовт гьич е бевр.
Э эйлонме туь хуб дениш, хундегор,
Фэхьле ве ранжбер, дусде вокурдегор.
Кошде богъгъо ве вокурде хунегъо,
Чуьн гІэруьс ярашуьгъ доренуьт угъо.
Дирейт гъэйгъусуьз гешде гІэиллере,
Гуьрде гъул деде э богъче сейл зере?
Игъо сохденуьт гьеммеймуре межбур,
Эри гуфдире эз дуьшмен: «Десе бур!»
Эри эн хэлгъгъо довгІо нэгІлетини,
Войгей эн иму дусди, шолумини.
Биё туь, ковтер, чуьн гІэзизе гъуногъ,
Э Догъисту, нуьшде э тики догъ.
Дире дусдире, шолуме жофоре,
Республик иму, республик богъгъоре,
Метлеб иму, метлеб хэлгъ советире,
Бер э дургъо, поке ковтер, пар зере.

МЭГНИ Э ТОВУН ШОЛУМИ

Войгелуьни хэлгъ ме, хэлгъ эн совети,
Коммунизм вокурде, уре и гъэсди.
Хунегъо ве богъгъо дешендейм иму,
Ободи хосденим э гъуьлом иму.

Хунегъо ве богъгъо дешендейм иму,
Шолумире, шолумире хосденим иму.

Гьер милет э гъуьлом, келе ве чуькле,
Инсонгъо хоюгъо жофой хуьшдере,
Ферзендгъо эй бире хушбэхд э иму.
Еклубгире, дусдгъо, мидорим иму.

Ферзендгъо эй бире хушбэхд э иму,
Шолумире, шолумире хосденим иму,

У дутьшмен, довгъохогъ, хосдени беди.
Инсонгъо, шегьергъо пуч бире гъэсди.
Эз атом гужлуьни гъувот дусдиму,
Мугъоет мипоим, чуьн жоборд иму.

Эз атом гужлуьни гъувот дусдиму,
Шолумире, шолумире хосденим иму.

КРЕМЛЬ

Кремль! Кремль! —
Рачи Ватан ме.
Нисд э гҮьлом э туь бемзер бугьо!
Гуьнжоини туь, энжэгъ, э хэлгъ ме
Ве эй азади гъовхо беруьтгьо.

Э гъугъ туь вери астарей суьрхи,
Нишоней дусди хэлгъ улкей Совет.
Минорей туь, чуьн игид поисди,
Э минжи келе шегьер вилеет.

Эз туь ведини гьер шеш бэхш гҮьлом:
Гъовхой эн хэлгъгьо ве метлеб дуьлгьо.
Туь гьисди ишуьгъ жофокеш гҮьлом,
Шори тозе девр улкей азадгьо.

Кремль! Кремль! —
Рачи Ватан ме.
Э туь дери игиди хэлгъ ме.
Эзунжо Ленин рэхъбери дори,
Овурди эй хэлгъ мозол ве шори.

ИНСОН

Инсон — яратмей гІуьломи,
Инсон — ярашуьгъ энуні.
Нум эн Инсон келе гофи,
Эзу зиѣд туь ниофи.

Инсон — ободи гІуьломи,
Инсон — гъувот девр имуни.
Инсон — эй инсон гъисди тен,
Е чиш эзу нисди звер.

Инсон — эвлод шолумини,
Инсон — метлебдор энуні.
Э довгІохогъ нисд лоигълуь,
Нум Инсони у вегуьруь.

НИШОН ДУСДИ ВЕ ШОЛУМИ

И дие нисд овосуне
Ве Сулейман холинчеси.
Ракет Совет гьисд нишоне,
У жофой эгъуъл нен деси.

Э у дери хьохмой хэлгьи
Нишон дусди ве шолуми.
Эри торих тозе велги
Э биёвгьо рэхьвокуни.

Келегеди ве шориму
Диеш зиёд бири гьони.
Изму гӀэлем азадиму
Ярашуьгълуь э менг вери.

Ватан Совет — мозол эн девр,
Гьинор туьре гъэдер нисди.
ТэҠрифи туь гьисди звер,
Нишонбурму, мэгӀдон расди.

Изму гьемме: дусд ве дуьшме,
Боворинлуь дениширет.
Миёв у руз, имидуьм ме,
Э Марс мерав ракет Совет.

ГУЪЛБОГЬОР

Туь эз васал зу гуьл дорей, Гуьлбогьор.
Гуьзете нум гьобул сохдей, Гуьлбогьор.
Игид жофо гьони бирей, Гуьлбогьор.
Э дуьл шогьир эшгь венгесдей, Гуьлбогьор.

Хун, туь, мэгИни, зен Совети!
Хун, буьлдуьр богь вилеети!
Туь эз васал рачи гьони,
Дуьл туь пури герми гьоми.

Кини э кор пушо дегьо? — Гуьлбогьор.
Кини уьлуьг эшгь хьовиргьо? —
Гуьлбогьор.
Кини ченд норм доренигьо? — Гуьлбогьор.
Кини сэхьиб дусди дуьлго? — Гуьлбогьор.

припев:

Э девр совет туь бэхд офдей, Гуьлбогьор.
Сэхьиб келе улке бирей, Гуьлбогьор.
Э вэхд довгю гьовхо бердей, Гуьлбогьор.
Ватане туь гьэлхэнд дошдей, Гуьлбогьор.

припев:

Диеш омбор кор мисохим, Гуьлбогьор.
Коммунизмеш мивокуним, Гуьлбогьор.
Жофо мибу деш хьуьрметлуь, Гуьлбогьор.
Зиндегуни диеш ворлуь, Гуьлбогьор.

припев:

ГЪИСМЕТ КУЪГЪНЕ БОГЪДОР

— Чуьни гъечи туь тигъэтлуь
Э и сибдор чум донорей?
Эз гуьлгъоюш сипи муь туь,
Гуйге омбор туь пир бирей?

— Туь дуз нисди, хьовир кори.
Чуьл сал пушо и сибдоре
Эй е шои муьзд дореи,
Кошдебируьм э инжиге.
Руьшгъо сиегъ бугеш у вэхд,
Эз муьрс жофо кемер бу гъэд.
Изму тегьер гуьлгъой эн дор,
Доренуьтгеш руьшгъой ме тов.
Жофой мере э девр совет
Дорет келе гуьзет, хьуьрмет.

БУЛЕ БЕГЬЕР

Руз эдее варасде,
Вер песини э дес де.
Шохьонгумиш куьнд бири,
Пес мемунит, бэхьс гирит.

Екемигеш хьэрекети,
Буле бегьер гьисди желди.

Иму десдей жовонгьо,
Десдей кукгьо, духдергьо,
Метлеб жофой иму гьисд:
Тонн онгур дим гьеждегь — бисд.

Екемигеш хьэрекети,
Буле бегьер гьисди желди.

Буле тэхуьл ве бегьер,
Веровунде гьер тегьер,
Дорим, дусдгьо, мугьоет,
У эриму гьисд гьир'ет.

Екемигеш хьэрекети,
Буле бегьер гьисди желди.

МЭГНИ МОЛДУШГЬО

Молдоргой колхози, желд кор мисохим,
Ватане деш омбор шир ве гушд мидим.
Молгойму куьк мибу эз ем бире месд,
Чуьн глов чой, шир эй дореи гъэсд.

Духдергьо, молдуьшгьо,
Хуним мэгнире.
Эшгьлуье сэгьдушгьо,
Сохим желд коре.

Зу себэхь вэхуьшде э софе эвир,
Молдуьшгьо бэхьс берим, гьемме бирембир.
Э и вэхд, э гъэд кор чуьшме вохурде,
Гуйге уш эз иму нишон вегуьрде.

Духдергьо, молдуьшгьо,
Хуним мэгнире.
Эшгьлуье сэгьдушгьо,
Сохим желд коре.

ДУХДЕРГЬОЙ КОЛХОЗИ

Э лувгегьой гуьллуь доргьо,
Гьушгьо сохде жевлонвози.
Эз бегьергьо гуьрде доргьо,
Варайсди богъ колхози.

Инжо десдей эн духдERGЬO,
Э гьэд эни гуьзеле богъ,
Жерге гуьрде эз сер вергьо,
МэгIни хунде, сохде ологъ.

Дуь эз еки, э бэхьсевоз,
Хуб кор сохде, пушо рафде.
Дуь эз еки рачте овоз,
Ширин-ширин мэгIни хунде.

Эз эшгьлуье жофой эн кор,
Согъ руз гирошд зури-зури.
Буле бегьер сохде ошгор
ТэгIрифире э руй хори.

Назлуь-назлуь чувшмей гьоми.
Рач черх хурде пэхьни бире.
Гуйге гьони у е чуми,
Э гешд эдей огол зере.

Гьечи сохде гьер руз коре.
Гьинорменде духдергьойму.
МэґІни меш рачи доре,
Желде жофой духдергьойму.

ИХДИЛОТ ПИРЕ ГЬИЛИЛ

Э зир тутдор, э онгурбогъ,
Э сер савзе, эз рэхъ гъирогъ,
Нуьшдебирим е ченд жогъил,
Э эйлонмей пире Гъилил —
Эн зарбечи колхоз иму,
Ихдилоҭчи мэгІрекейму.

Гъилил омбор гІэзиз хосде,
Жовонгьоре дире десде.
Юш куьнд бире унжо нуьшде,
Угьоре гуш эри дошде.
Оммо гьемме уре дире
Вэхуьшденуьт, жиге доре.
Еки гьони эз и десде
Гуфди, э дуьл дошде гъэсде:
—«Эй хьовиргьо, хуб мибисдо
Эри иму келе усдо
Мигуфдиге е-дуь келме,
У э Москов э выставке,
Дарафденге э Кремля,
Чуь дириге э унжиге».
Гьемме уре гьувот дорут,
Э лой Гъилил чум донорут.
Пире Гъилил екем домунд,

Э сер рушгъо десе гердунд.
Эз дуъл Гъилил шори паруьсд,
Ловгъой энущ екем хэндуьсд.
Луьнггъореш но э гъенг гъэйчи,
Ихдилоте сер гуьрд гъечи:
— Негуфдиреш гӀэмел ниёв,
Дуъл меш дие нис доре тоб,
И гъони нисд овосуне.
Э ихдилот нисди хумне.
Тегьер мӀгӀни еде гъээзел,
Гьер гоф мидуь раче мезе.
Гуюм, дусдгъо, дирем э хов,
Гуйге деруьм э гъэд Москов.
Э генгӀидим у нисд хумне,
Гьер чи дери э унжиге.
Фикир сохде, мугум э дуъл:
«Дураз мибу инжо гӀуьмуьр».
Омбор сохдум эй ме ниет
Эри бире унжо гъисмет.

Е ченд салгъо э гъэд колхоз
Кор сохдейм э екиревоз,
Кура богъгъош бисдо обод,
Буле бегьер бисдо зиёд.
Дин не лово несохд кумсг,
Гъинор жофо, бегьер тегъенг
Расунд мере э метлеб ме,
Рафдуьм гъечи э Москов ме.
Мигуиге э пире вэхд
Э сер Гъилил омори бэхд.
Е-дуь келме гуюм эйшму,
Несовусде руьгъэ изму,
ТӀгӀрифигъой эн Москове,
Шогъ эн шегьер шегьергъоре.

Метребегъо жерге — жерге,
Вероморет э гьер жиге.
Э тегьер богъ кучегъойю,
Гъуногъдори одомию.
Шев эз тики туь мивини,
Гуйге асму э зофруни.
Гъэд шегъере эри гешде,
Эз зир хори гъисди жиге.
Гуьзет эн гилм ве эн жофо
Гъисди и рэхь, рэхь эн «Метро».
Уш тэгИрифи нисди гъеле.
Рачи Москов гъисд Кремля.
Гьер хунейю гъисд миноре,
Э гъугъ юш ве е астаре
Шевиш, рузиш, тегьер чуйшме,
Гьер тарафе товуш доре.
Эри хэлгъгъо рэхьбурмуни.
Нисд э гуьлом де эзуни.
Руьхь хундеи эн Ленини
Э у дегъо товуш гъони.
Гуьзет Москов гуюм уни,
Москов чигърет девр имуни.
Э у де хьохмой инсонет,
Гъувот дусди эн гьер милет.
У гъисд сервор ве пушобер,
ТэгИрифую гъисди звер.
Гъовхобергъой эн шолуми
Гъувот эзу вегуьрдени.

Сохде сабуьр екем Гъилил,
Гене дуьл ю небу гъемин.
Э пёсини келмей хуьшде,
Эз жогъилгъо деш куьнд нуьшде,
Тегьер сургъой эн пэхьники,

Гуфди гофгьо еки — еки:
— «Хосденуъм ме эйшму, дусдгьо,
Бире игид э кор жофо,
Тегьер пире Гъилил, гьелбет,
Э у Москов бошит гъисмет».

МЭГНИ ЖОВОНЕ ОНГУРБОГЪДОРГЪО

Гуьл ди, гуьл ди, богъ онгури,
Э туь жофой иму дери.

Жофо гIуьзет жовонини,
Софой энущ эн имуни.

Веровунде буле бегьер,
Зиндегуни мерав зевер.

Чуьн богъ васали,
Доренуьт гуьл
Жовоне онгурбогъдоргъо.
Чуьн догъ садсали,
Муьхькеми дуьл
Жовоне онгурбогъдоргъо.

Тегьер игид коре сохде,
Дуьл жовони муьгьбет дошде.

Хуним мэГни жовонире,
Хуним, эшгъ дим дуь екире.

Кук не духдер э е войге,
Сохим гьуллугъ гьер тегьенге.

п р и п е в :

Жовонгьойму гъуногъдорут,
Эшгъ эн дусди угъо пурут.

Хушей онгур, еде пейле,
Мидуът угъо е ченд гиле.

Ижиреют жовонгьойму,
Ярашуьгъи эн девр иму.

п р и п е в :

ИГИД ЖОФО

Игид жофо — тарлан чулгьо,
Сэхьиб богъгьо ве заводгьо,
Гьисди рачи эн девр иму,
Эри гьемме нишонбурму.

Хуним эшгълуй, сес дуь мэгӀни,
Рузгьой иму жовонини.
Э и гӀуьлом мозолмендим,
Чуьн е кифлет зигьисденим.

Дениш туь, дусд, э гьер тараф,
Хэлгь вокурде, тегьер сараф,
Хуне ве богъ,— нике мирод,
Коре сохде, тегьер жоборд.

п р и п е в :

Гьер одоми девр совети
Эдей сохде хьэрекети,
Тегьер игид, бэхьс бердени,
Эй овурде бэхд ве були.

Хуним эшгълуй, сес дуь мэгӀни,
Рузгьой иму жовонини.
Э и гӀуьлом мозолмендим,
Чуьн е кифлет зигьисденим.

МЕ КОММУНИСТУЪМ

Ме имуруз эз гьер рузгьо
Омборте гоф сохдем кура,
Эй нуьвуьсде сад верэгъгьош,
Эшгъ ве хъэвес гьисди мере.

Э гьерлой куьнж ватан шори
Зиндон жофо эдей куфде.
Эй игидгьо дуьл ме гьони
ТэгІрифлuye мэгІни хунде.

Эшгъ игидгьо Партией
Ве гьем гьувот жофокешгьо.
Э коммунизм пушобери,
Доре говуш эри хэлгъгьо.

Туй, Партией эн Ленини!
Туй, Партией азадни!
Эй жофокеш туй гьисд мозол,
Дуьл шогьире сохде туй шор.

Чуьтам гьони ме нуьвуьсуьм,
Э гъэд дуьл ме и шорире?!..
Чуьтам, дусдгьо, миё верзуьм,
И мэгІни ме партиере?!..

Гъечуниге минувуьсуьм:
—«Ме шогьир — коммунистуьм!»
И гоф мибу эй ме шовгю.
Э кор жофо ве э гъовхо.

НУЪКЕРЕИ ДУСДИ

Рихденуът сеслuye гIовгьой эн Самур,
Эз догъгьо э дере, э Каспи, э дур.
Эз унжо гирошде серхъэд эн дусди,
Азербайджан, Дагестане е гъэсди.

Эз у лой чой сес дорени Апширон.
Избербашиш эзу вегуърде нишон.
Сумгайит ве Каспийск дерафдет э бэхьс,
Гуьзеле шегьергьо оморет барас.

Ерашуйгъ инсони богъгьой эн Ширвон,
Мезелуьни бегьер богъгьой Дагестан.
Э и гуьлишоне ватан Совети,
Хьэсуьл омори бирори ве дусди.

Сеслуй рихде гIовгьой Самур хун мэгIни,
Эз эшгъ желде жофой хэлгъгьой бирори.
ГIовгьой туьреш э каналгьо кешире,
Месд мисохим фирегьуне муьлкгьоре.

Диеш сес ди, шевиш — рузиш кор сохде,
Гьеми товуш, гьеми гьувот туь доре.
Гую хэлгъ меш: туь гьисд чуйкле чой Волга,
ТэгIриф доре хуну мэгIни Самуре.

МЕДСЕСТРА ВАЛЯ

Дузи, дусдгьо, гьер сенигIэт
Эй одоми гьисди хьуърмет.
Сохдениге эз дуьли у,
Темиз бире кор жофой ю.
И мэгIнире нуьвуьсденуьм,
Чуьн хунчей гуьл, бэхш доренуьм
Дуьлверовун нечогъгьоре,
Надуьшменде медсестраре.
Валя нуми у духдере,
Чуьтам недуьм тэгIриф уре?..
Дорд мидогеш келе яра,
Мибисдогеш дуьл ме пара,
Гуйге мелхьэм бу гьер гоф ю,
Тимор сохде, дуьл дорембу.
Сие гьошгьо, килче сифет,
Чумгьо муьгьре, дуьл пур муьгьбет,
Э ён бонле гьербо минуьшд,
Гоф мигуфди, лов михэндуьсд.
Гуйге суьгьбет соймишини,
Гьер гоф энупап ширини.
Нимешевиш хосе духдер,
Э нечогъгьо микешисер.
Эн екире пэхьлуьй юре,
Эн екиге боли юре

Мисохд у дуз, гловиш мино,—
Эй кор хуьшде у гьисд усдо.
Эз сенигІэт эн медсестра
Нисд сенигІэт хубте дие.
Эри инсон хосдени у:
Гьеми жунсогъ ве жоборд бу.
Эзи зиёд нибу ниет,
Ижирей и сенигІэт.
Унегуьре и мэгІнире
Верзиренуьм медсестраре.
Дуьл шолуми дери уре,
Валентина, дусд шогьире.

ЯРАШУЪГЪИ ГУЪЛИ

Евош-евош эдембу уёнмиш бире эз хов,
Мержгъо, зимигъо ве богъгъо эеки`э

хэлгъэвоз.

Чуьшмеш суьфделе эз гъирогъ асму дорембу
тов,
Дегнш сохде коврире э суьрхине рангевоз.

Десде гуьрде жовонгъо эз гъемме зу, сегьери
Угъо эдет рафденуьт руге богъгъой колхози.
Карасди кори э дес, бенд мэгIни э лов вери,
Гъем зарифет мисохдут, гъемиге шоре вози.

Инжо е кук гъе песово мидениши и рэхъэ,
Гогъ мичаруьсд, мипоисд, песде мирафд
пушово.

Кире сохде гузет у, дусде ненге хьэрмэхъэ?..
Уре хубте мигуют вохурдутге дуь дусдгъо.

Гьер одоми эни дигъ хуб шинохде Гуьлире,
Сие гъошгъо, мигърову, сарафменде духдере
Кор сохдеки хундени э эшгъэвоз мэгIнире,
Э руй чуьшме хэндуйсде, шор сохде дуьл
гъемере.

Дуьлелесо бугьо кук бирден вини Гуьлире,
У недануьсд сеч сохде нишонере э сине.
Эз дур тигъэт у доре, мидениши ченд гиле.
Товуш мидо э чумгьо, чуьн зуьм-зуьме
астара.

У гьисд келе нишоне э гьуьмуьр эн жовони,
Чигьрет Ленин э мигле, гене вебу пенж
хьэрфгьо:
Ярашуьгьи эн сине, мозол дусди эн дуьлгьо
«ВЛКСМ»— ини гьуьзетлуье нишон Гуьли,

МЭГНИ БЭХШВЕГИРГЬОЙ ЖОФОЙ КОММУНИСТИ

Нишон були эн тозе девр
Гьисди жофой коммунисти.
Эри бире деш бэхдевер
Женг берденим, чуйн эй расди.

Хуним, эшгъ дим екире э кор,
Мирайм иму пушово дуьлшор.

Э кор жофо ве э кифлет
Номусе иму дошденим.
Коре сохде эшгълуй ве желд,
Гьиноргьореш бурмунденим.

Хуним, эшгъ дим екире э кор,
Мирайм иму пушово дуьлшор.

Себэхь бугьо шегьер ве богъ
Гьисдуйт бэхш эн жофой иму.
Э коммунизм мирайм уьзьегъ,
Тегьер богъбон э богъ иму.

Хуним, эшгъ дим екире э кор.
Мирайм иму пушово дуьлшор.

АЛЕКСАНДР

Эри немурдение игид дов-
гой Ватани 1941—45 с. с.
танкист *Александр Мардахаев*.

Э куьнж эи Кавказ, э Махач-Кала,
Зенде омори гIэзизе бала.
Э гъэд умогъгьо, суьгъде бироргьо,
Э мезрей Москва, э дигь Козино,
Синере норе гъэлхэнд поисде,
Александр танкист, тэгIрифиде,
Поке гIуьмуьре, ширине жуне,
Дори эй Ватан, рихунде хуне.

Шаргьой Каспия сэхд хьуьршлуь бире,
Дешенд шивене, у лепуьр зере.
Шэхдегьой энугь э гIэрс чаруьсде..
Буьлдугь хэбер до, эз дур парусде..
Хэбер гурунд бу, дуьлгьо муьхкемте,
Алик ширин бу, Ватан — зиьдте!
У эри Ватан жуне гьурбуни
Сохдигеш, гене Ватан энугь

У э зуьгIбей женг хунс рихунди,
Войгей энуре Ватан дануьсди,

Мовзолей Ленин э Москов дебу,
Бегем э унжо эй дуьшмен рэхь бу?
НэгI!

Эри дуьшмен рэхь ю бу беседе,
Чуьн Алики желд, омбор поисде
Рэхьзо нидорут, биёвт пушово.
Чуьнки рэхь не бу дне песово.

Изму эз Кавказ ченгъэдер дури,
Э хок Ватани у депичири,
У чуькле дигъле, дигъ эн Козино,
Едигор Алик ве женгъой гъовхо
Мунди эриму ве эри дедей.
Уре зендигъо, у суьгъде дедей.

Чуьн поке гIуьмуьр, гъечу пок дошде
Ватан нум туьре, гIэзизе дусд ме.
Гъэлем шогъириш дестонгъо беседе,
Мидору гъоим нум Алик — дусде.

ВОЙГЕЙ ДЕДЕЙ

Хис, балай ме, ширин жун ме,
Хис, ненуй сох, эёвлуйй ме.
Хис, эри туь раче гофгьо мигуюм,
Себэхь эри туь нике хэбер миёрум:

Чуьтам бебе э завод,
Чуьтам бирор э серхьэд,
Хосде гIуьломе хушхьол ве обод,
Шолумире дошденуьтге гьэлхэнд.

Хис, балай ме, ширин жун ме,
Хис, ненуй сох, эёвлуйй ме.
Хис, тозе шив гуьлишоне богь Ватан,
Келе бире хубе коргьо хунде дан.

Туь мибоши инженер,
Енебуге агроном,
Мисохи Ватане туь бэхдевер,
Товдор ве гужлуй э гьеммей гIуьлом.

Хис, балай ме, ширин жун ме,
Хис, ненуй сох, эёвлуйй ме.
Хис, мозолменд гуьлишоне девр иму,
Рачи коммунизм мибошит ишму.

ОШУГЪ ХЭЛГЪИ

Э гүвзет ёровурди шогьир
хэлгъи *Сулейман Стальски*

СенигІэткор ширине гоф,
Эй хэлгъ хуьшде, эри Ватан,
МэгІнигьоре, чуьн холибоф,
Мигуьнжунд ошугъ Сулейман.

У сес симгьой зере саз туь,
Измущ зенг ю э гуш дери.
Эз сер догъгьо, чуьн сес буьлдурь,
Мугьомлуй у оморени.

Э минжи гьугьэр тракторист,
Э гьэд зими бичинчигьо,
Э рэхь деригьо машинист.
Игиде корхонечигьо...

Э гьер зугьун, э гьер жиге
Шиниреним эшгьлуйе сес.
У мэгІни э гьемме жиге
Игидгьоре доре хьэвес.

Желде кукгьой эн догьлуйгьо,
МэгІни ошугъ э дуьл дери,

Э гъэд женггьой келе гъовхо
Гьинор ишу зиёд бири

Изму мэгИни дусде шогьир
Э жофой шолуми дери.
Нум Сулейман гьич нибу вир,
У эриму гІезиз бири.

МУЪХЪКЕМЕ ПАЛУТДОР

Э гуьзет оморен шогьир
хэлгъи Азербайджан Сулей-
ман Рустам э ш. Дербенд.

Э иму, догълуьгъо, е хубе гІэдоти:
Гъуногъгъо оморэ э иму мироди.
Нун — муьнуьк эй доре гъемише хьозури.
Туь эйму гъуногъ нисд, гІэзизе бирори.

Руз васал, Сулейман, оморей туь мигъму.
Тегьер васал туь шори овурдей эйму.
У муйгъой эн сер туь э гуьлгъо хумнеи,
Оммо дуьл шогьир тегьер жовон хундени.

Муьхъкеме палутдор эй чуькле гъэлхэнди.
Садсалгъо едигор боругъой Дербенди.
Э угъо ме бемзер сохденуьм дусдире
Хэлгъгъой Азербайджан ве эн Догъистуре.

МэгІнигъой шогьиргъо парусде тегьер гъуш,
Эз девргъо э девргъо у доре яравуьш.
Жовоне шогьируьм ме офдем гъэнетгъо,
Сулейман Рустами кумегчи эвлодгъо.

У БУ ДУСД ХЭЛГЪ

Эй еровурди шогьир тати
Юно Семенов

Эри ме эдее сохденуым гумон:
Э гуьлом омори ченд жире инсон,
Гьеркире мидануь е дивэгл бире,
Сургьореш э дуьл ю нидани дире.
Омборгьо гьишденуьт нумники энжэгъ,
Нис рафде гьич вэхдиш эз лэглэй эн хэлгъ.
Никисох муьрденге эз гуьмуьр бивэхд
Хьэйфбери сохденуьт, дорд доре дуьл сэхд.
Песг, чуйтам дорд недуй гьони дуьл шогьир?
У бу дусд эри хэлгъ, усдо ве хьовир.
Гьэлеме вегуьрде, минуьвуьсд дестон,
Гьер келме эгуьл бу эри эн инсон.
Кечуьке мивегуьрд, гьэлеме норе,
Фэхьлеи эй сохде, нисохд негире.
У чире гьуьзуьргууьл, вегуьрди э дес,
Пуьрсири, чуьн шогьир, эйчуьни кеф — хьэз.
Эз расдиш тэхьл сохди э хуьше хьэзе,
Не бири эз дуьл ю хэбер гьич кесе.
Дануьсде, дануьсде астаре вихди,
Э зир эн комики эз деде бири.

Астаре вихдигъо куынд бу эз чышме.
Булутгъо тор сохдут бире, чын дутьше.
Имугъой дур бирей эзиму, бирор,
Дестонгъо туй гышдей эйму едигор.
Чын шогъир чыккле хэлгъ, э торих мерай,
Эз лэгъэй эн дусдгъо гыч вэхд нифурай.

САД МЕРД ВЕ Е ЗЕН

Эри Матаева Берта.

У сад мердгьо солдатгьоюот,
Сигъ поисдет э се жерге.
Э довгюо нис дарафденуът,
Угьо веруът э сер сегъне.

Довгюоре нис хосде угьо,
Ерэгъ неде э дес ишу.
Эй шолуми хунде угьо.
Ве эй Ватан — гІэзизишу.

Э пушой жерге поисд,
Чуьн командир, духдер тати.
Надуьшмендлуь десгьою гьисд,
Мигуиге дуь гъэнети.

Деслегьоре у мижумунд
Ве эшгъ мидо сад мердгьоре.
Э солдатгьо у мибурмунд
Дуз хундеи мэгІнигьоре.

Э фикир ме зинде бисдо
Чуьтам зенгьо бируьтге гьул.

Гьони угьо бирет усдо
Гьер сенигIэт ве мэгIнихун.

И томоше войгей мени.
МэгIни хундеш сенигIэти.
Э дуьл шогьир дешенд гьони
Эшгъ ве шори духдер тати.

ШОГЬИР, ДУСД МЕ

Шогьир, дусд ме, дануьсденуьм,
Чуьн буьлдубрчин, туь рач хунде.
Эдем эз туь пуьрсиренуьм,
Эри эн ки ве чуь хунде?

Дерьёгь гьич вэхд нибу гловсуьз,
Сервор нибу гьич гьушунсуьз,
Шогьир гьич вэхд нибу хэлгьсуьз,
Эз хэлгь жуоро нибу хунде.

Битмишигьо жиже доре,
Э руй хори муьхькем бире.
Хэлгь игиде гьувот доре,
Хэлгьсуьз шогьир эшгьсуьз хунде.

Эз суру дур бугьо бейгьуш
Зу мисоху рэхьэ фурмуш.
Гофгьой шогьир биренуьт пуч
Эри эн хэлгь не хундге у.

Эз дур мегешд гьозиере,
Нешинирей овозере?
Э хэлгь хуьшде ки сер зеге,
Эри энущ хэлгь ю хунде.

**МЕСКЕНСУЪЗ ЖОВОН,
ГІУЪМУЪР ПУЧИНИ**

Не хурдей бодe, боши оворе,
Гъэриб ве Меджнун туь эри бирe.
Гъушгъош эришу гуьрдeнуьт луле.
Мескенсуьз, жовон, гІуьмуьр пучини.

Дес туь суьрхини, сес туь буьлдуьрчин,
Мизробе зерe, хундени гъер сим.
Бегем эй инсон нисд обур ве син?
Мескенсуьз, жовон, гІуьмуьр пучини.

Дирейге э богъ, э доргъо луле,
Гъушгъо овурде хурег эй бала.
Кифлет эшгъ доре гъэнет эй зерe.
Мескенсуьз, жовон, гІуьмуьр пучини.

Нуьвуьсдем мэгІни эри туь чор бенд.
Мевинош туь, дусд, э гІуьлом гъич дерд.
Туь мескен офде, бош тегъер эн мерд.
Мескенсуьз, жовон, гІуьмуьр пучини.

МЭГНИ СЭГЪДУШГЬО

Гъуъжуъм туьре рач мегирим.
Тимор сохде муйгьоре.
Эз гьер гъул туь сэхд мигирим,
Мивохурим доморе.

Эзунн руз гердо гене
Гъул гІэиле гуьрдени,
Оморе гье э и хуне,
Бэхин бебе вегуьрдени.

Оммо небу сэгъдушгьоре
Сохи фурмуш, дур бире.
Винойм гене духдергьоре,
Э метлеб дуьл расире.

ГОФГЬОЙ ГІЭРУЬС

Бэхшлемиш сох э ме, бебе,
Жофой туь бу эйму, гьемме.
Хьэлол сох туь доре нуне,
Дошдейгьо туь э и хуне.

Мегирис туь, шор бош дедей,
Хьэлоле шир мере дорей.
Гьер гоф туь бу эй ме эдеб,
Изму бегьем бисдо метлеб.

Сэгьдушгьой ме, дуьлшор бошит,
Ишму, дусдгьо, метлебдорит.
Нике гьисмет мере хуно.
Эри ишмуш офд биёво.

ОМБОРЕКБУ, ОМБОРЕКБУ!

(МэгІни эн гІэруьси)

Имишев гьисд шев эн шори,
МигІид дусде нуьшдегоргьо.
Ярашуьгъи межлуьс гьони
Гьисдуьт гьуше беседе дуьлгьо.

Омборекбу, омборекбу,
И гІэруьси, и ГІэруьси!
Омбор гердо э гьеммейму,
Ижуьр межлуьс имурузи!

Тегьер эвир софе васал,
Тегьер ковтер, поке суьмуьргъ,
Ухшешинуьт эри Ватан,
Тозе кифлет эни дуь муьргъ.

припев:

Муьгьбет дусди э дуьл дери,
Жовонгьойму лап омборут.
Муьхькем гердо деш шолуми,
Э метлеб дуьл угьо расуьт.

Омборекбу, омборекбу,
И гІэруьси, и гІэруьси!
Омбор гердо э гьеммейму,
Ижуьр межлуьс имурузи!

ГЪЕЧИ ЭЙЧУЪ?

Гъеле гъисдуът е парагьо
Хосиет ишу хуб нисдуътгьо,
Усолире дире угьо
Гъич нигуют: гъечи эйчуъ?

Чуькле сохдгеш хьуърметсуъзи,
Зарале кор ве хэйрсуъзи,
Мигуиге гъэйгъусуъзи,
Нипуърсуъ у: гъечи эйчуъ?

Оммо э ю сарф гъисдиге,
(Э жегъендем кор кесиге!)
Усэглэт у тоб не доре
Пуърсирени: гъечи эйчуъ?

Гуюм изму меш, хундегор,
И хосиет вебирегор
Э рэхь иму нисди бирор.
Пуърсуъгу юш: гъечи эйчуъ?

ЗАРИФЕТГЬО

Екимуьн — Гъуше поим гьердуйму,
Ихдилоте сер гирим.
Гъэгъри бирегор бугу,
Гофе иму мидедим.

Дуьимуьн — Ме хьозурум гу гъучогъ,
Тиркомуймеш лап тижн.
Эз мейду нирам гъирогъ,
Поисдем меш э минжи.

Екимуьн — Бригадир колхоз иму
Омбор бирени гюси.
Кими вэхд гуфдире у:
«Мере эй туь кор нисди!»

Дуьимуьн — Дануьсденуьм у гофе
Не гуфдири негъогъи.
Миё бери эз хуне
Бутылкалей эрэгъи.

Екимуьн — Членгъой ревком колхоз
Согъ сал э богъ нис бире,
Э контор э гъэд когъоз
Не гьомборгъо дебире.

Дуьимуьн — Жофо сук бире гьелбет
Эй вегуьрде гьэгъ коре.
Оммо отчёт э жэгІмет
Те эхир сал нис доре.

Екимуьн — Гуьрдлемея эн колхози
Согъ сал нис бире кура.
Бегем и кориш дузи,
Ненге себеб гьисд уре?

Дуьимуьн — Председатель дур нисди.
Эз ме эйчуь пуьрсире?
Коргьой энду дуьруьсди,
Кемсуйгигьо нисд уре.

Гьердуьеки — Гоф имуре гуфдирим,
Ишму муьхшуьлот бошит,
Гене иму мохурим,
Те умогьой согъ бошит.

* * *

Екимуьн — Гьери, хьовир, гу очугъ
Эйчуь Хьэсдил гьисд тембел?
У гешди э ченд гьууллугъ,
Гене бикор..., чуь себеб?

Дуьимуьн — Ведекуьрди дуь зене,
ГІэилгьош гьисд угьоре.
Эз алимент терсире,
Сеимуьн дошде юре.

Екимуьн — Мишинохи Сидигъэ,
У э колхоз кор сохде.

Эз Масков те Мешдэгъэ
Эйчуь гъечи у гешде?

Дуьимуьн — Шинохденуьм ме уре,
Нум ю э колхоз дери.
Справкаш гъисд юре,
Суке жофо гешдени.

Екимуьн — Чуь рач гешдени Тирэхь,
Тирлимугъум ве темиз.
Дире оморе темэхь,
Гуйге уре гъич гІэйб нисд.

Дуьимуьн — ГІэйб энунисд буруне,
Гешденигеш пуф-пуфе.
Бура виниш э хуне,
Мидешени туь туфе.

* * *

Екимуьн — Зевер Дербенд гъисди догъ,
Унжо вери е гъэле.
Сунере хосде Исогъ,
Уре гъисди сад келе.

Дуьимуьн — Зофруй Дербенд дерьёгъи,
Гювю палаш, шурови.
Сунере туь михогъи,
Э келегъо чуь кори.

Екимуьн — Дуь тараф Дербенд богъи,
Унжо вери ченд мейво.
Гофгъо мирав негъогъи,
Нэхъси сохдге келегъо.

Дуьимуьн — Тегьенг гьисдгеш пичире,
Бегьер энү ширини.
Туь гъэгър эйчуь вечире,
Э духдер сэхд чум дени.

Екимуьн — Боруй Дербенд гьисд сенгьи,
Гъопугьойю огьуни.
Дегь гьозор келе гъэгьи,
Эй ме у кор четини.

Дуьимуьн — У гъэлегьо, боругьо,
Мундет эйму едигор.
Суне эйму гьисд бугьо
Эзу девлет — дегь гьозор.

Гьердуьеки — Соймиши э девр иму
Совдосуьз, пулсуьз бире.
Мозоллуь гьисмет мибу
Э Исогь, гьелбет, Суне.

ДОКЛАДЧИК ВЕ СОДОКЛАДЧИК

ГІэзизе хундегор, гъечу данит ки ишму нуьшдейт э гуьрдлемей колхоз, э коминжо председатель эдее сохде доклад э товун овхьолет мол-гъэредори. Э меш тапшуьрмиш сохде омори эри сохде содоклад. Гуит, хьовир председатель.

Докладчик — Дуьруьжде мол э ферма
Э имуруз пенжогъ гьисд.
Дуьшие мол имуре
Э у хьисоб мибу бисд.

Содокладчик — Эзу гъэйри молдуьшгьо
Эри се гов екини.
Е сесейге хьокимгьо
Унжо сохде векили.

Докладчик — Керг-вечеймуш кем нисди,
Эз дивисдиш зиёди,
Хурегиш ки гье гьисди,
Кор э инжо боботи.

Содокладчик — Унжо, гуйге, гІэйб неде.
Еки дошде сад керге,

Еки хое шуморде,
Еки э ченд нуьшдеге.

Докладчик — Эри ферма машингьо
Воисдени восдоре.
Воисдени бу угьо
Эри сохде гьер коре.

Содокладчик — Туьре омбор воисде.,
Эри сохде гьер коре.
Колхозе туь хуб хосде,
Буш фуьрсоре гофгьоре.

Гьердуйеки — Ижуьр доклад сохдегор
Гьелем гене кем нисдуьт.
Гоф дорутгеш лап омбор,
Оммо э кор хэйр нидуьт.

ДУЪ ВОЙГЕГЬО

Гуюм эйшму е ихдилот
Эз товуней духдер Ифрод.
Эз шори эн духдер хуьшде
Жиге ниофд эри нуьшде.
«Э гьопуй ме е сад илчи,
Эз хундегор те чекмечи,
Оморенуьт эри хосде
Э рузию е ченд десде», —
ВэгІз мидо у э кин гьемме,
Эз ловгьой ю гьилиз рихде.
Оммо эзи гофгьо духдер
Эз расдекиш бу бейхэбер.
Э хундеи бу муьхшуьлот,
Гоф ни гуфди э у Ифрод.
Войгей эн зен небу пэхьни,
Воисдембу уре егІни,
Гьерки омбор до рэхьпули,
Духдере у доренини.
Оммо дедеш бу бейхэбер
Эз соймиши эни духдер.
Э техникум э хундеки
Соймиш бирет сэхд эеки.
Варасденге хундеире,
Гуьрде угьо гьул екире,

Оморенуът э кин Ифрод.
Э чум эн зен дарафд лап од.
«...И-иш-му чуйтам.., инжо гьечи?
Не оморе сэхьиб илчи?!..
Песг ки мидуь рэхьпулире?
Ниветовум ме и дерде»...
Кук ве духдер диплом э дес,
Гьердуьй ишу э е нефес
Мугу:
— «Дедей, сох бэхшлемиш.
Эз зуревоз гьисдим соймиш.
Рэхьпулиму ини диплом,
Мозоллуним э и гуьлом!»
Перт бисдо зен, дуьл ю паруьсд,
Дие дир бу, коре дануьсд.
Тегьер деде, мугу Ифрод:
— «Бошит эй ме ишму эвлод!»

ГЪЭЙГЪУСУЪЗЕ РЭХЪБЕР

Бируъм гъуногъ э Билхъэди,
Э далдей догъ деригъо дигъ.
Асму очугъ, сузов бу шев.
Зимисдуни, оммо нисд верф.
Эз сер эн шев"э гоф"нуьшдим,
Е муьхшуьлот де не офдим.
Чуьнки э дигъ нисди избач,
Дечарусди клуб бирач.
Дир оморе инжо кино,
Тегьер гъуногъ, мерс хуно.
Дузире ме гуюм, дусдгъо,
Мундет гене е парегъо,
Нум ю ишу гъисдуьт рэхъбер,
Эзи коргъо гъисд бейхэбер.
Инжо гъуногъ оморемгеш,
Чуьтам бошум гъэйгъусуьз меш?
Битобе дуьл шогъир мугу
Тиге гофгъо э инжо гу,
ГІэйбелуь сох у корсохэ,
Недануьгъо войгей хэлгъэ.
...Е гІэдот де э шогъиргъо,
Шев сохденуьт коре угъо.
Э и шев ме хов вир сохдум,
Э сер эни дестон нуьшдуьм.

Оmmo инжо вэгдо-вэгдо
Эз жеиге сес миомо.
Диренуьм ме э и вэхди
Э товуши чирогъ нуьшди,
Е зен эдей холи бофде,
Э дес шуне, энгуьл куфде.
Гуюм эз расд, сохдум шори,
Мугум тэхьно нисдуьм гьони.
У эдее холи бофде,
Нике фикир э дуьл дошде.
Меш дестоне нуьвуьсдеки,
Э дуьл дошдем метлеб ники:
Хосденуьм ме э у утогъ,
Э же нуьшди у зен эн догъ,
Дебу товуш электри..
Эри рэхьбер фикيري ини.
Клуб, избач ве кино бу,
Форигъэти эн хэлгъ хуб бу.

Дигъ Билхьэди

ИХДИЛОТ СЕРБИЛОГЪИ

Е зен мугу эз екиге:
— Кучеймуре туь дириге,
Миглею гьисд месе гуьрде,
Дуь тараф ю доргьо кошде,
Э гьер хьэёт дери билогъ,
Гюв ю мелхьэм, жун бире согъ.
Э кучейму дери сернуьш
Эн горсовет хуьшдени юш.

— Кучеймуре туь дириге, —
Гуфди песде у зениге, —
Гьисди малад, битемизи,
Рэхь эн гювиш дуз дуь верси...
Сернуьш екем эй зигьисде
Э кучейму миёсд нуьшде.

МЕ – МЕНУЪМ!

Мугу хьофдранг ме лап рачуъм,
Эз ме рачте нисд дие гъуш.
Гъэргъэш мугу темиз менуъм,
Ченд нэхуьй меш нисди бейгъуш.

Гъисд чендигъош, нум нигуьруъм.
Э ухшеши эни дуь гъуш.

КУМЕГЧИГЬО

Деде, бебе, холу, холе,
Дусд ве гъунши э иловле,
Э минжишу геймиш Суне,
Эдет рафде э жеиге.

— Пуърсуйруым ме:

«Шори, ники,
Э же ишму гьемееки?
ГӀэруьсини эри Суне?»..
— НэгӀ,— жугьоб до Бебейхуне,—
Техникуме у варасди,
Э районгьо рази нисди.
Э гъэд шегьер эдейм гешде,
Уре э кор эй дешенде.

ГЕНЕ БЕБЕ Э РАЙОН БУ?

Белкем э хэлгъ нисдге шинох,
«Игид» мэгІни, Юсуьф — корсох?
Э райцентр гьуллугъчини,
Э дигьбонгьо у гешдени.
Рафде гьербо у э район
Вогошдени бире пиён.
...Е руз машин «Волга» омо,
Зен не куклеш ведиромо.
Мивинуьт мерд сэхд пиёни,
Тегьер эн жэгІ, бегьем шуьли.
Э и хьолиш мерд буйругъ до:
«Шороб, шороб.., биёр ебо!..»
Папкей юре еки вегуьрд,
Е дуьдуьйге эз гьулгьо гуьрд.
Кукле дире бибешуре
Эз хоригьо пой кешире,
Эз дедешу бирден мугу:
— Гене бебе э район бу?

ДИГЪ ПЕЛТЕКГЪО

Э е дигъ ме е руз дируъм
Мисохдут гоф гьемме пелтек.
Омбор мэхьтел инжо мундум,
Гуюм гене гьисдге е тек.

Пуърсиренуъм ме эз еки:
— Эз дедеи бире кори?

— Председатель ю пелтеки,
Унегуъре мод офдори.

* * *

Гьелеш гьисдуът е парагьо,
Хуб те хэреб не дануъсде,
Вегуърденуът нишон угьо,
Эз хосиет эн келете.

ЭЗ СЕ ХОНУМ КОМИ ХУБИ?

Эз гуьмуьр нисд зиёд келе,
Энжэгъ мибу ю си сале.
Балаю сар сие черде,
Тегьер пелтек, зугъу гуьрде.
Нум юш, дусдгьо, гьисд Хьэсенбег,
Ижуьр мердгьо биренуьт тек.
Духдир молгьо сенигIэт ю,
Кемиш нисди хундеи ю.
Тегьер недан, коре гуьрде,
Тегьер туьлки, зу фурмунде.
Ижирей эню чигьрет,
Шек нисохи эзу гьелбет,
Гьисд гуфдире уре гьинор,
Эй вегуьрде зенгьо омбор.
Бинесуьз гьуш, зере жевлон,
Гешди гьечи э ченд район.
Эйчуь бири у оворе,
Эз ки гьони пэхьни бире?
Нисд себебсуьз и гьозие,
Гуюм, дусдгьо, ме дузире:
И Хьэсенбег, «игид» иму,
Лап гьэдерсуьз гьисд темэхь ю.
Се зен хосди рэхьзо дори,
Э чоримуьн чум донори.

Эн гьерсешу нумгьо Хонум,
Диремунде гуьрдени чум.
Пуьрсируьм ме эз мерд э рэхь,
Эйчуй сохде гьечи темэхь?
Гуюм еки хос'етсуьзи,
Эри туь у г'эмелсуьзи.
Песг дувимуьн туь вегуьрдей,
Чуй тэхсир туь эзу офдей?
Дедей г'эил сеимуьне,
Туь чум шенде, гьишдей жейле.
Эзуними пэхьни бирей,
Алиментеш туь недорей,
Эз хьофд догь дур туь вирихдей,
Э Гьемейди далде гуьрдей?
Эз зугьу деш бире пелтек,
Лэг'э вокурд и Хьэсенбег.
Мугу: эз зен мере нисд бэхд,
Чуйтам гуьруьм угьоре сэхд?
Э ме лоигь миё офум,
Песде уре ме сэхд хоюм.

...Дузи, дусдгьо э нолоигь,
Гьич е зениш нибу лоигь.
Хьофдимуьнеш мивегуьруь,
Е сал зиёд у низигьуь.
Чуйнки э у дери г'эзор,
Екиш э у ние бу той.

Дигь Гьемейди.

ГЪОЗИЕЙ КУЪДУЪ

Шев зимисду э дигь Муьшкуьр,
Эз ихдилот бире Муьхшуьл,
Нуьшдебирим динж саламет,
Куьдуь э дуьш, тегьер шелбет.

Гье э и вэхд, эз некуми,
Сес эз хуней эн Овруми.
Пой бирэхьне Биче зен ю,
Мугу: вирихд шуьверлею.

Меки медан вэгІдо-вэгІдо
Э дуьл Оврум гоф миофдо,
Мивэхизунд э хуне женг,
Хьюьршлуь бире, тегьер пеленг.

Дедей гІэил, юш ки бедхьол,
Э сер бесде е чуькле шол,
Офдо э дигь, гІэрс рихунде,
Шуьвер юре эри гешде.

Э сес омо гьулум-гьунши:
— И чуь кори, лап чешмиши?!—
Мигуфдурут гьерки-гьерки.
— Бисдчор сале гІэил нисдки.

Мугу белкем садан — шидим,
Гешде бири э гъэд эн дигь.
Э руй Оврум вохурдиге,
Эзу товне жин гуьрдиге.

Гьемме инжс келе, чуйкле,
Гешдуйт угьо дигь ве чуле.
Биче и хьол гъэгьр вечире,
Тэхьно мигешд гъэд вишере.

Бирден хэбер омо раси,
Эз дигь дурте дуз е верси,
Тегьер жуьже у пичире,
Эз зир куле офдут уре.

Дузи, дусдгьо, кем нисд мердгьо,
Е э шегьер, е э дигьгьо,
Тегьер гІэил, дира гуьрде,
Эз кифлетгьо дур вирихде.

Дигь Муьшкуьр

ХОСИЕТСУЪЗЕ ЮШВЭГІ

Тегьер хурус, кекуьл вери,
Тегьер дилмож, зугьу вери,
Эй кор сохде лап тембели,—
Ижуьр усол гьисди дивэгі,
Э туь вегьо хос'ет, Юшвэгі.

Тегьер гиче, нипою динж,
Одомире сохдени гиж,
Гофгьою буш, неде гьичиш,—
Ижуьр усол гьисди дивэгі,
Э туь вегьо хос'ет, Юшвэгі.

Эри бире колхоз ворлуь,
Юш э колхоз деш хуб зигьуь,
Коре миё соху эз дуьл,
Хэлгьиш гую гьони дивэгі
Дегиш бири, хуби Юшвэгі.

Дигь Мушкуьр

КУР ВЕ РУЬШУЪМ

Руьшуьм ю бу эз эгъуьл гъит,
Оммо кур бу лап эгъуьлменд.

Руьшуьм мугу:

— Эй, кур, гуиг
Астарегъо вериге ченд?

Куриш мугу:

— Бэхдсуьз руьшуьм,
Шумордем, дуз навад кеми.
Бигеинжон хэр ве руьшуьм,
Согъ гІуьмуьр кур бире хуби.

ДУЪЛ МЕ УРЕ ХОСДЕ

Эз ме гьони пуьрсиритге
И мэгІнире эй ки хунде?
Эз ме гене гуфдиритге,
Бегем туь гьич нис вомунде?..

Жугьоби ме, гьелбет, мибу:
Вохурдем ме э е гуьл богъ
Рачи мэгІни гьисд чигьрет ю,—
Нисд эзуні э е умогъ.

Чуьни бегем рачи энү,
Чум туь э у сэхд домунди?
Гьер умогъэш гьисд рачгьою.
Келеими тефигІэти?

Эз гьэд эн богъ гуьл чиреки,
Энжэгъ еки дуьле гуьрде.
ТефигІэти, расд, уники,
Муьгьбет дуьл ме уре хосде.

Унегуьре и мэгІнире
Гье михунум невомунде,
Эри энү дуре дусд ме,
Эз комики дур нисд дуьл ме.

ИГИД ДУЪЛ МЕ

Чуьн астарегьо, э асму жесде,
Чумгьой туь мере дуьндуьрмиш сохде.
Желди жофой туь эшгь доре дусде,
Диренге игид эз кор вогошде.

Биё, севгил ме,
Игид эн дуьл ме.
Биё, мигьрибон,
ГІэзизе жовон.

Эз мол эвруьшуьм ейлугьэ духдем,
Э миглей эндуь гоф вечирем:..
«Дусди гІуьзети!»— муьхькем дорутгьо,
Войгей дуьл бире, те арт зигьуьтгьо.

припев:

Духдер жофоюм, хэлгь ме гьинорменд,
Войгей эн дуьл ме э Ватани бенд.
Бошим, севгил ме, жоборд кор хэлгьи,
Дусди эн иму мибу лоигьи.

Биё, севгил ме,
Игид эн дуьл ме,
Биё, мигьрибон,
ГІэзизе жовон.

КУК НЕ ДУХДЕР

Кук — Эшгъи муьгъбет де э дуьл ме,
Биё, жун ме, мепой кенор.
Энжэгъ туьре хосде дуьл ме,
Биё, жун ме, мепой кенор.

Духдер — Бегем дилег эшгъи муьгъбет
Эн туьнуьм ме, жогъиле кук?
Бегем менуьм эн туь гъисмет,
Дусд вихдейгъо, жогъиле кук?

Кук — Э богъ меров сиб ве онор,
Темэхъ сохде гъер дирегор,
Э метлеб ме сох туь бовор,
Биё, жун ме, мепой кенор.

Духдер — Мейвогъоре э богъ дире,
Тэгъиди месох эри чире.
Эз ме бегем мибу чоре
Гъони эй туь, жогъиле кук?

Кук — Чуьшмей дусди хушбэхд сохде,
Руйгъоймуре темиз дошде.
Муьгъбет эн ёр гъувот доре,
Рази бош туь, мепой кенор.

Духдер — Ишуьгъменди руз эн хоси,
Э и Ватан эн гІэзизи,
Разинуьм ме эй гІэруьси,
Эн туьнуьм ме, жогъиле кук.

Гьердуьеки — Туьни, севгил, шори дуьл ме,
Вихде дусд ме, ширин жун ме,
Разименди жогъили ме,
Хосде дилег эн туьнуьм ме.

* * *

Гуьли — Сур эз дусд гьич нибу пэхьни.
Эри ме туь биё рэхь ни:
Тэхсири ме чуйни егІни?
Гу, севгил, эй ме чоре.

Довид — Эз гьэд эн богъ гьуьзуьргууьли
Вихдемгьо е теке гуьли,
Тэхсир туь нисди, ой Гуьли,
Миофум ме чорей туьре.

Гуьли — Е гьозорю миёвт векил,
Мибошут эри ме зенжил,
Имид ме э туь, севгил,
Эри ме сох туь е чоре.

Довид — Дан, туь дусд ме, нисдим
тэхьно,
Фирегьуьт эриму рэхьгьо,
Доренуьм ме туьре шовгІо,
Миофум ме чорей туьре.

Гуьли — Шевгьош ме дуз тейте себэхь
Нихисуьм, мибошум чумрэхь.
Эри Гуьли бош туь хьэрмэхь,
Оф, севгили, эй ме чоре.

КОГЪОЗ ТУЪ

Вегуърденге ме когъозе
Денишируъм э руй конверт,
Унжо хундум ме дуй ризе,—
Гуйге пур бу гъэд ю муьгъбет.

Те векенде руй энуре
Дуьл ме мисохд омбор тэгІди.
Фегъм мисохдум иловлере,
Кес денишириге егІни.

Чумгъо жесдуьт э руй когъоз,
Тигъэт доре э гьер келме.
Дуьл мисохд гоф э туьревоз,
Гуйге ёри э пушой ме.

Ме варасдуьм хунде уре,
Вогорушиш сохдум гене.
Нисди хэбер эз ме туьре,
Эдей сухде дуьл ве сине.

Песде мундум ме гъэйгъулуй,
Ченд жуьр хэёл э ёр омо.
Ох веромо эз дорун дуьл,
Мугум зуте, дусд ме, биё.

ЭРИ ДУРЕ ДУСД

Мидануьми дуьл тоб доре,
Руй эн дусде у не дире?
Мибисдоге гъэнет гъони
Миоморум эз гъовои.

Дуре дусд ме, туь бовор сох,
Месухун дуьл мере негъогъ.
Егъин миём, туь бовор сох,
Эри дусди гъэле нисд догъ.

Нисди хэёл мере дие,
Воисдени туьре дире.
Тегьер чуьшмей эн себэхьи,
Эри руй туь сэхд темэхьи.

Мегу севгил, гъэйгъусуьзуьм,
Эй войгей туь ме рэхьмсуьзуьм...
Тегьер васал дире хосде
Дуьл жовони гъони дусде.

МОЗОЛЛУЪЕ ВОХУРДЕИ

Мисохдум ме э дуьл ниет,
Дирируьмге э богъ колхоз,
Ебо семе сохум суьгьбет
Э звеновод Девроревоз.

Э кор гӀожиз ме нисдуьмгеш,
Уре дире, гоф ниофдум.
Оммо ю диренки мереш,
Мидениши тиж эз зир чум.

Шохьонгумиш куьнд биребу,
Чуьшмеш эдей сер зерени.
И дэгьдэгъэ шогьид мибу
Эри эни вохурден.

Бегьем бисдо метлеб дусди,
Очмиш бисдо сур соймиши.
Чуь рач гьер ло вараисди,
Эвир гьовош гьони хуши.

Гуйге омбор небу суьгьбет,
Дегиш бисдо ранг эн асму.
Гьеле гофгьо не варасдет,
Эз ме мугу бурайм изму.

— Рафденигеш, месох фурмуш,
Вохурдейму метлеблюьни.
Дуьл ме дие нибу хомуш,
Тейте туьре ме хосдени.

Э РЭХЬ Э КИН ЁР

Э рэхь э кин ёр буравгьо,
Бегьем уре ховиш нибу.
Руй ёре дире воюгьо,
Рэхь эри ю дураз мибу.

Ёре глэзиз сэхд хоюгьо,
Фикир энун омбор мибу.
Э чумгьою рэхьгироргьо,
Тегьер сое веди мибу.

Эй гуфдире э дусд хуьшде,
Раче гофгьо у мивихуь.
Гьер келмере э дуьл дошде,
У вогоруш гье мисоху.

Оммо ёре у диренге.
Эз зугьуниш пелтек мибу.
Сабуьр офде, гоф гуфдиге:
«Хосденуьм ёр» — энжэгь гую.

ЭЙЧУЪ СОХДЕ, КУК, ТУЪ МИНЕТ?

Эйчуъ сохде, кук, туъ минет?
Бегем мерде нисди гъир'ет?
Пешму бирей, туъ вогошдей,
Белкем э дуъл туъ гъэсд дошдей.

Гу дуъл туъре,
Ди сур туъре,
Белкем вогошд дуъл ме гене.
Сабуърлуъни,
Рэхьмедуъли,
Ижуър хос'ет вери зене.

Дие мере небу ниет,
Рази бируъм ме э гъисмет.
Тегьер васал бируъм ме шор,
Эри туъ бу дуъл ме ошгор.

припев:

Эз фикир туъ бируъм ме дур.
Мидошди туъ пэхьнуъе сур.
Рафдебири, хубте дире,
Дие эйчуъ пешму бире?

припев:

У КУКЕ ХОСДЕНУЪМ, ДЕДЕЙ

Мегу эй ме де нумиге,
Вихде кук гьисд мере, дедей.
У кук нисди э инжиге,
Мие биёв у, жон дедей.

Эй энү мидуъм товуш,
Эй энү мибошум гьуш.
Бовор сох э ме, дедей,
Хосденуъм уре, дедей.

Винириге, дуьлшорини,
Гьисмет эн ме гьисд у, дедей.
Сие черде, хунширини,
Гуьл дуьл мени у, жон дедей.

Эй энү мидуъм товуш,
Эй энү мибошум гьуш.
Бовор сох, э ме, дедей,
Хосденуъм уре, дедей.

Тегьер чуьшмей эн себэхьн,
Миёв эз дур инжо, дедей.
Эй духдер туь у хьэрмэхьн,
Эй туь домор у, жон дедей.

Эй энү мидуьм товуш,
Эй энү мибошум гъуш.
Бовор сох, э ме, дедей,
Хосденуьм уре, дедей.

Э ПЕНЖЕРЕ НУЪШДЕ ДУХДЕР

Нуъшдебируъм э пенжере.
Нэхче гуьлгьо эй вечире.
Бирден дируъм е куке ме
Э пенжере чум доноре.

Чумгьою тиж,
Сер бисдо гиж,
Дуьл мере берд,
Бисдорум зерд.

Мугум гене гьери винуъм,
Э у кук ме хуб денишуъм.
Чумгьоре ме покурденуъм,
Ховиш нисди, эвреинуъм.

Чумгьою тиж,
Сер бисдо гиж,
Дуьл мере берд,
Бисдорум зерд.

Эз пенжере сес диромо,
Мэглуюмсуьз бу гуфре гофгьо.
Варасируъм ме гьесбо.
Эз гьошгьою ве эз чумгьо.

Чумгъою тиж,
Сер бисдо гиж,
Дуъл мере берд,
Бисдорум зерд.

Дуъл ме дие тоб не доре,
Вокурденуъм пенжерере.
Е дэгъдэгъэ не кешире,
Парусде кук нуьшд э ён ме.

Чумгъою тиж,
Сер бисдо гиж,
Дуъл мере берд.
Бисдорум зерд.

Недануьсдуъм варасире,
У кук э ме чуй гуфдиге.
Гуйге сохдум вир хуьшдере,
Кук эз ён ме дур биренге.

Чумгъою тиж,
Сер бисдо гиж,
Дуъл мере берд,
Бисдорум зерд.

НИЕТ ДУХДЕР

Мибу у руз, миёв гъисмет,
Бегъем мибу хосде ниет.
Чуьн гуьл васал, гуьл мибошум,
Севгилире сэхд миhoюм.

Денишире парандегъо,
Мисохут бэхили угъо.
Чуьн буьлдуьр богъ ме мибошум,
МэгІни эй дусд ме михунум.

Севгилире мигуьруьм гъэл,
Э уревоз нивинуьм гъэм.
Дире уре, шор мибошум,
Дусди юре сэхд мидорум

МЭГНИ ДУХДЕРГЬО

Миёв васал, гуьлгьо мибу,
Дуьл жовони эшгь пур мибу.
Эри хуьшде
Дусде гешде,
Соймиш бире, хушбэхд мибу.

Сес ди, буьлдуьр, хун мэгИнире,
Хун, э иму кумег бире,
Эри гьисмет
Келе муьгьбет,
Сэхд хоюгьо дуь екире.

Васал мирав, гене миёв,
Нидани дусд эз же миёв.
Е руз мибу,
Гьисмет мибу,
Эри духдер е бэхд миёв

ЭРИМУ МИМУНУ МУЪГЪБЕТ ЕДИГОР

Дануьсденуьм хосденим екире сэхд,
Эри чуй не бисдо имуре у бэхд,
Бошим гъисмет, дуьлгьо хосдере хуно,
Товуш дуьт эриму муьгъбет ве шовго?!..

Бовор сох, бирени гьелбет е себеб,
Герек нисд э инжо дургуне эдеб.
Нис бире эеки бэгиэигьо гъисмет,
Сохдутгеш шев ве руз угьо хьэрекет.

Дурим эз еки, гъисметиш не бирейм.
Дуь руй екире бегьемиш не дирейм.
Мирай э кесгьо, гъисмет оф миёв,
Эриму мимуну муьгъбет едигор.

ХОСДЕ ЁР СОХД МЕРЕ ПЕШМУ

Яратмише нэхче гуьлгьо,
Ишмунит дусд, эшгъ буьлдургьо.
Бэхили ме гьисд э ишму,
Хосде ёр сохд мере пешму.

Тегьер сурдор, гуьл себэхьни,
Эйчуь руге сохдей пэхьни?
Воку руге, ди туь суре,
Белкем офдум эй дерд чоре.

Хуьшдендурьусд, мейволуь дор,
Эз хьол ме бош туь хэбердор.
Воисдембу мереш дире,
Бегьер дусди, соймишире.

СУЬГЬБЕТ ДУСДИ

Суьгьбет дусди бу эхирсуьз,
Эйчуьниге бирден бурри.
Гоф нимелит бире сессуьз,
Бисдорим гьэргъ эз некуми.

Поисдигеш эз гоф зугьун,
Тиже чумгьо мидениши.
Мигуиге е сур дебу
Э и суьгьбет эн соймиши.

Эйчуьниге дуьлиш гуп-гуп,
Тегьер сэгIэт кор сохдембу.
Гуйге гIэтош зерембу луьп,
Дуьл жовони сэхд сухдембу.

Бирден сер ме бисдо гьэриш,
Чуь бисдоге не дануьсдуьм.
Песде бире ме уёнмиш,
Сере э душ кук дирируьм.

Варасируьм гьозиере:
— И чуь кори сохдум гьони?!..
Чуьтам сохум фурмуш уре.
О, туь гьисмет эн жовони?

Суьфден моч, моч эи дусди,
Гу эри ме очугъ суре?
Гу туь, сурдор, туьре гъэсди,
Чуь гъисмет гъисд изму мере?

ЖУГЪОБ ДИНОР

Динор е руз вегуърд когъоз
Эз шинохэ кук дигъншу.
Не вохурди э уревоз,
Дусдиш неде э гІэрешу.

ГІэйб мномо омбор куке,
Нис офдембу фегъм эй хуьнде.
«Минуввуьсдуьм когъоз буге»,—
Мэхъово сохд, метлеб дошде.

Дарафд когъоз э дес Динор.
Хьэрекет сохд эри хунде.
Гьечиш-гьечуш чарунд омбор,
Недануьсд у хэте хунде.

Эй бурмунде э кес гІэйби,
Войгей куке дануьсдени.
Дуьл эн Динор до битоби,
Песде эй кук нуьвуьсдени:

«Когъоз туьре вегуьрденге
Ченд точкагьо ме венорум.
Дан, угьоре туь хундиге,
Когъоз туьреш гьечу хундум».

ХОЛ

Раче сергьо омбор дирем,
Кеме нэгъуъл не шинирем,
Ижире хол эз дедеи,
Э гьутине ме недирем.

Хол ю гьисди сие шеве,
Шей себэхьи э сифет вс.
Эй эню хол шогьир хунде,
Тэхъл сохде у шевгьош хове.

Эз хол зиёд духдер гене,
Дошди рачи э гъэд сине.
Мидуьм тэгИриф у рачирс,
Дуьл эн дусди де унжиге.

САБУЪРЛУЪИ

Мибу булут, биренгъине ве гром.
Гене гъово бире сокит, дусде ёр.
Эз гьер чигъош зиёд гъисди э гъуълom
Сабуърлуъи бэхш гъисмети дусде ёр.

Дануьсденуьм гъэгърелуьни туь гъони,
Негъогъ дуьл туь эдей доре битоби,
Гъэд чумгъой туьш эз хун бири шороби,
Сабуърлуъи бэхш гъисмети дусде ёр.

Бегем мибу фурмуш сохде дусдире?
Бегем мибу журо сохде дуьлгъоре?
Нисди гъэдот пузмиш сохде шовгъоре,
Сабуърлуъи бэхш гъисмети, дусде ёр.

* * *

Шиновусдем хьол туь нисди, нечогъи.
Дуьл эн дусди гъич дорд нидуь негьогъи.
Хосденуьм ме эри туь, дусд, жунсогъи!
Туь дерд мекеш, сабуьре дор, ширин ёр.

Дарафденге э гушгьой ме овозе,
Кеширенуьм шевгьо-рузгьо ме жозе.
Фикиргьой ме диеш биренуьт тозе.
Туь дерд мекеш, сабуьре дор, ширин ёр.

Эри гъисмет гъонун гоф нис нуьвуьсде,
Кей омогеш, уре нибу дануьсде.
Эй гьер дердгьош сабуьрлуьи воисде.
Туь дерд мекеш, сабуьре дор, ширин ёр.

* * *

Сери ебо ме гирошде
Эз ён гьейвуй эн шишей,
Чумгьо туьре омбор гешде
Себэхьмунде ве сершеви.

Воисдени гъэнет зенуьм
Вером унжо э ён туь тек.
Енебуге луле гуьруьм
Э гьейвуй туь, чуьн паруьсдек.

Чуьтам гуьом эрз эн дуьле,
Сэхьиб гьейву гьисдгьо духдер.
Ме овурдем десдей гуьле,
Веги уре, бош бэхдевер.

ВАСАЛ ОМОРИ

Буьлдур э эшгъэвоз мэгІнигъо хунде.
Гуьлгъо руй очугъут, гъэнет вокурде.
Менуьм гъуш туь, биё, васал омори.
Менуьм гуьл туь, биё, васал омори.

Э жофо муьхшуьлуьм, нум дусд де э дуьл.
Э ховиш диренуьм поисдей гъуьндурь.
Жобрд ме туь, биё, васал омори.
Бэхд мени туь, биё васал омори.

СЕВГИЛИ

Тэхьно лампе хунере товуш нидуь,
Севгилисуйз бегем дуьл ёр тоб мидуь,
Дусд не бире ловгьой энунихэндуй,
Пар зе биё, ёр гузети, севгили.

Дор ве савзе васале сохде гузет,
Парандегьош гьони руьхьленмиш бирет.
Чумгьой ме, дусд, э у рэхь туь домундет.
Пар зе биё, ёр гузети, севгили.

Э чул, богъче вадарафде гешдеки,
Гуйге эз ме эдей гуфдире еки:
«Эжи дусд туь, бегем гьони туь теки?»
Пар зе биё, ёр гузети, севгили.

ГУЪЗЕЛ

Дануьсденуьм э рачи туь нисди сер,
Шогь эн гуьлгьош э туь нибошут бемзер,
Гьер энгуьл бенд муйгьой сер туь гьисд
гъэзел,¹
Чуьш бисдоге рэхьмлуь миё бу гуьзел.

Онгур Дербенд туьре хуно нисд ширин,
Дирем туьре, нибу дие дуьл гьемин.
Ниёсд бире вохурдеи эз гьезел,
Изму рэхьм бер, сурул мебош туь, гуьзел.


Эри дусди гъэлей Дербенд нисд чапар,
Мере дире э улойге туь мечар.
Миёв у руз ме мигуюм эз туь «зен»,
Биё месох ингъэдер наз туь, гуьзел.

МЕ ТУЬРЕ АСТАРЕ МИГУЮМ

Ме туьре астаре мигуюм,
Эри туь мэгIнире михунум,
Раче сер, инчебел,
Муьгьбет дуьл ме, духдер.

Э гIуьмуьр жовони офдем ёр,
У эй ме кумеги э гьсер кор.
Раче сер, инчебел,
Муьгьбет дуьл ме, духдер.

Омогеш эриму жейлеи,
Туь эй ме астарей рэхь мени.
Раче сер, инчебел,
Муьгьбет дуьл ме, духдер.



Э асму жесд астаре,
Бирден вини кук уре.
Мугу ёгын бэхд мени,
ЕгІни вэгІдо куьнд бири.

И кук омбор инжо гешд,
Астарегьо е ченд жест.
Оммо духдер не омо,
Бур себэхьиш вероמו.

ГЪУШ ВЕ МЭГІНИ

Гьэнетлуть гьуш жевлон зере э эвргьо,
Оммо гьуьмуьр кутэхь бире эн туь, гьвш.
МэгІни шогьир зигьисдени сад девргьо.
Ченд шивдагьош уре сохде вогоруш.

СЕРНОМЕ

| | |
|--|----|
| Дусди хэлгъгъо — гъувоти | 5 |
| МэҠни эри Ватан | 6 |
| Догъисту | 7 |
| Ковтер шолуми | 8 |
| МэҠни э товун шолуми | 10 |
| Кремль | 11 |
| Инсон | 12 |
| Нишон дусди ве шолуми | 13 |
| Гуьлбогъор | 14 |
| Гъисмет куьгъне богъдор | 16 |
| Буле бегъер | 17 |
| МэҠни молдуьшгъо | 18 |
| Духдергъой колхози | 19 |
| Ихдилот пире Гъилил | 21 |
| МэҠни жовоне онгурбогъдоргъо | 25 |
| Игид жофо | 27 |
| Ме коммунистуьм | 28 |
| Нуькерей дусди | 30 |
| Медсестра Валя | 31 |
| Ярашуьгъи Гуьли | 33 |
| МэҠни бэхшвегиргъой жофой коммунисти | 35 |
| Александр | 36 |
| Войгей дедей | 38 |
| Ошугъ хэлгъи | 39 |
| Муьхъкеме палутдор | 41 |
| У бу дусд хэлгъ | 42 |
| Сад мерд ве е зен | 44 |
| Шогъир, дусд ме | 46 |
| Мескенсуьз жовон, гъуьмър пучини | 47 |
| МэҠни сэгъдушгъо | 48 |
| Гофгъой гъэруьс | 49 |

| | |
|-------------------------------|-----|
| Омборекбу, омборекбу! | 50 |
| Гьечи эйчуь? | 52 |
| Зарифетгьо | 53 |
| Докладчик ве содокладчик | 57 |
| Дуь войгегьо | 59 |
| Гъэйгъусуьзе рэхьбер | 61 |
| Ихдилот сербилогъи | 63 |
| Ме — менюьм! | 64 |
| Кумегчигьо | 65 |
| Гене бебе э район бу | 66 |
| Дигь пелтекгьо | 67 |
| Эз се Хонум коми хуби? | 68 |
| Гъозией куьдуь | 70 |
| Хоснетсуьзе Юшвэг! | 72 |
| Кур ве руьшуьм | 73 |
| Дуьл ме уре хосде | 74 |
| Игид дуьл ме | 75 |
| Кук не духдер | 76 |
| МэгИни Довид нен Гуьли | 78 |
| Когъоз туь | 79 |
| Эри дуре дусд | 80 |
| Мозоллуье вохурден | 81 |
| Э рэхь э кин ёр | 83 |
| У куке хосденуьм, дедей | 85 |
| Э пенжере нуьшде духдер | 87 |
| Ниет духдер | 89 |
| МэгИни духдергьо | 90 |
| Эриму мимуну муьгьбет едигор | 91 |
| Хосде ёр сохд мере пешму | 92 |
| Суьгьббет дусди | 93 |
| Жугьоб Динор | 95 |
| Хол | 96 |
| Сабуьрлуьи | 97 |
| Сабуьре дор, ширин ёр | 98 |
| Сэхьиб гьейву гьисдгьо духдер | 99 |
| Васал омори | 100 |
| Севгили | 101 |
| Соеюш эри ме гIэзизн | 102 |
| Гуьзел | 103 |
| Ме туьре астаре мигуюм | 104 |
| Э асму жесд астаре | 105 |

Сергей Изгияев

СТИХИ

На татском языке

Художник Г. С у н г у р о в. Художествен. редактор В. К у л и ш
Редактор М. Б а х ш и е в

Техн. редактор М. Х а н у к а е в. Корректор М. Х а н у к а е в.
Сдано в набор 25/XII-1962 г. Подписано в печать 1/III-1963 г.

Форм. бум. 70x92¹/₃₂. Бум. л. 1,6875. Печ. л. 3,375.

Усл. печ. л. 3,95. Уч.-изд. л. 2,3. С01634. Цена 12 к. Тираж 1000.

Дагестанское книжное издательство Министерства культуры
ДАССР, Махачкала, ул. Маркова, 55. Зак. № 1467.

Типография им. С. М. Кирова Министерства культуры
Махачкала ул. Маркова, 51.

Цена 12 коп.

МАХАЧКАЛА 1963

СЕРГЕЙ ИЗГИЯЕВ

СТИХИ

На татском языке